

唐書合鈔

唐書卷第十四

本紀十四

順宗

順宗至德

道宏

大聖大安孝皇帝諱誦德宗長子母昭德

皇后王氏上元二年正月生於長安之東內

始封宣大

麻十四年六月封宣王建中元年正月丁卯

德宗紀在

年十二月乙卯新書

立為皇太子

為人寬仁喜學藝善

本紀同當從德宗紀先拜從德宗幸奉天常執弓矢居左右郤國公主以蠱

事得罪太子妃其女也德宗疑之幾廢者屢矣賴李泌保護乃免後侍宴魚藻宮張水嬉綵艦宮人為權歌眾

樂間發德宗歡甚顧太子曰今日何如太子誦詩好樂無荒以為對及裴延齡韋渠牟用事世皆畏其為貞元

相太子每候顏色陳其不可故二人者卒不得用二十一年正月癸巳德宗崩丙申即位於太極殿上自

二十年九月風病不能言暨德宗不豫諸王親戚皆侍醫藥獨上卧病不能侍德宗彌留思見太子涕咽久之大行發喪人情震懼上力疾衰服見百僚於九仙門既卽位知社稷有奉中外始安庚子羣臣上書請聽政二

月辛丑朔

癸卯朝羣臣於紫宸門

甲辰以河陽三城行軍司馬元

韶爲懷州刺史河陽懷州節度使丙午罷翰林醫工相工占星射覆冗食者四十二人已酉以易定張茂昭兼同平章事以來朝故寵之是夜太白犯昴辛亥以吏部郎中韋執誼爲尙書左丞同中書門下平章事壬子淄青李師古以兵寇滑之東鄙聞國喪也甲寅釋仗內囚

嚴懷志呂溫等一十六人平涼之盟陷蕃久之得還以
習蕃中事不欲命出外故囚之仗內至是方釋之日本
國王并妻還蕃賜物遣之辛酉貶京兆尹李實通州長
史尋卒壬戌以太子侍書翰林待詔王伾爲左散騎常
侍充翰林學士以前司功參軍翰林待詔王叔文爲起
居舍人充翰林學士以鴻臚卿王權爲京兆尹甲子御
丹鳳樓大赦天下諸道除正敕率稅外諸色權稅並宜
禁斷除上供外不得別有進奉百姓九十已上賜米二
石絹兩匹版授上佐縣君仍令本部長史就家存問百
歲已上賜米五石絹二匹綿一屯羊酒版授下州刺史

郡君

乙丑罷鹽鐵使月進

戊辰以開府儀同三司檢校太尉使持

節大都督雞林州諸軍事雞林州刺史上柱國新羅王

金重熙兼寧海軍使以重熙母和氏爲太妃妻朴氏爲

妃三月庚午出宮女三百人於安國寺

癸酉

又出掖庭教

坊女樂六百人於九仙門召其親族歸之戊寅以韋臯

兼檢校太尉李師古劉濟兼檢校司空張茂昭司徒丙

戌檢校司徒同平章事杜佑爲度支鹽鐵使戊子徐州

節度賜名武寧軍蔡州吳少誠兼同平章事以翰林學

士王叔文爲度支鹽鐵轉運使副杜佑佑雖領使名其

實叔文專總宰相賈耽兼檢校司空鄭珣瑜吏部尙書

高郢刑部尙書韋執誼中書侍郎鎮冀王士真淮南王
鏐魏博田季安皆檢校司空癸巳詔冊廣陵郡王淳爲
皇太子改名純夏四月壬寅制第十弟諤封欽王第十
一弟誠封珍王男建康郡王渙封邾王改名經洋川郡
王沔封均王改名緯臨淮郡王洵封淑王改名縱宏農
郡王浼封莒王改名紆漢東郡王泳封密王改名綢晉
陵郡王湜封郇王改名綜新書作總高平郡王淑封邵王改
名約雲安郡王滋封宋王改名結宣城郡王淮封集王
改名緄德陽郡王涓封冀王改名絳河東郡王浥封和
王改名綺十七男絢封衡王十八男續封欽王兩書本紀皆闕

据本傳補

十九男纁封會王二十男綰封福王二十一男紘

封撫王二十二男緄封岳王二十三男紳封袁王二十

四男綸封桂王二十五男縉

本傳作綽

封翼王彌臣國嗣王

道勿禮封彌臣國王西平郡王晟男左羽林大將軍愿

襲封岐國公食品三千戶戊申詔以冊太子禮畢赦京

城繫囚大辟降從流流以下減一等

賜文武官子爲父後者勳兩轉

以

給事中陸質中書舍人崔樞並爲太子侍讀庚戌封太

子男寧寬宥察寰察等六人爲郡王並食品三千戶癸

丑贈入吐蕃使工部侍郎兼御史大夫張薦禮部尙書

丙寅罷萬安監牧戊辰以杭州刺史韓臯爲尙書右丞

五月己巳以右金吾衛大將軍范希朝爲右神策統軍
充左右神策京西諸城鎮行營兵馬節度使丁丑以容
管經畧使韋丹爲河南少尹以萬年縣令房啟爲容管
經畧招討使癸未以郴州司馬鄭餘慶爲尙書左丞甲
辰以檢校司空忽汗州都督渤海國王大嵩鄰檢校司
徒承徽王氏趙氏可昭儀崔氏楊氏可充儀王氏可昭
媛王氏可昭容牛氏可修儀張氏可美人以右丞韓臯
爲鄂岳沔蘄都團練觀察使丁亥升襄州爲大都督府
臨漢縣仍徙於鄧城辛卯以鹽鐵轉運使副王叔文爲
戶部侍郎六月丙申

案是月無
丙申誤

詔二十一年十月己前

百姓所欠諸色課利租賦錢帛共五十二萬六千八百四十一貫石匹束並宜除免秋七月戊辰朔吐蕃使論悉諾來朝貢丙子鄆州李師古加檢校侍中贈故忠州別駕陸贄兵部尙書諡宣故道州刺史陽城左散騎常侍戊寅以戶部侍郎潘孟陽爲度支鹽鐵轉運使副丙戌關東蝗食田稼癸己新書橫海軍節度使滄州刺史程懷信卒以其子副使執恭起復滄州刺史橫海軍節度使甲午度支使杜佑奏太倉見米八十萬石貯來十五年東渭橋米四十五萬石支諸軍皆不悅今歲豐阜請權停北河轉運於濱河州府和糴二百萬石以救農

傷之弊乃下百僚議議者同異不決而止乙未詔朕承
九聖之烈荷萬邦之重顧以寡德涉道未明虔恭寅畏
懼不克荷恐上墜祖宗之訓下貽卿士之憂夙夜祇勤
如臨淵谷而積疾未復至於經時怡神保和常所不暇
永惟四方之大萬務之殷不躬不親慮有曠廢加以山
陵有日霖潦踰旬是用儆於朕心以答天戒其軍國政
事宜令皇太子勾當時上久疾不復延納宰臣共論大
政事無巨細皆決於李忠言王伾王叔文物論喧雜以
爲不可藩鎮屢上牋於皇太子指三豎之撓政故有是
詔以太常卿杜黃裳爲門下侍郎左金吾衛大將軍袁

滋爲中書侍郎並同中書門下平章事鄭珣瑜爲吏部
尚書高郢刑部尚書並罷知政事皇太子見百僚於朝
堂丙申皇太子於麟德殿西亭見奏事官八月丁酉朔
庚子詔惟皇天佑命烈祖誕受方國九聖儲祉萬邦咸
休肆予一人獲纘丕業嚴恭守位不遑暇逸而天佑不
降疾恙無瘳將何以奉宗廟之靈展郊禋之禮疇咨庶
尹對越上元內媿於朕心上畏於天命夙夜祗慄深惟
永圖一日萬幾不可以久曠天工人代不可以久違皇
太子純睿哲溫文寬和仁惠孝友之德愛敬之誠通乎
神明格於上下是用皇王至公之道遵父子傳歸之制

付之重器以撫兆人必能宣祖宗之重光荷天地之休
命奉若成憲永綏四方宜令皇太子卽皇帝位朕稱太
上皇居興慶宮制稱詒辛丑詒有天下傳歸於子前王
之制也欽若大典斯爲至公式揚耿光用體文德朕獲
奉宗廟臨御萬方降疾不瘳庶政多闕乃命元子代予
守邦爰以令辰光膺冊禮宜以今月九日冊皇帝於宣
政殿國有大命恩俾惟新宜因紀元之慶用覃在宥之
澤宜改貞元二十一年爲永貞元年自貞元二十一年
八月五日已前天下死罪降從流流以下遞減一等詒
立良娣王氏爲太上皇后良媛董氏爲太上皇德妃王

寅貶右散騎常侍王伾爲開州司馬戶部侍郎度支鹽鐵轉運使王叔文爲渝州司戶元和元年正月丙寅朔皇帝率百僚上太上皇尊號曰應乾聖壽甲申太上皇崩於興慶宮之咸寧殿享年四十六歲六月乙卯皇帝率羣臣上大行太上皇諡曰至德大聖大安孝皇帝廟號順宗七月壬申葬於豐陵

大中三年增諡至德宏道大聖大安孝皇帝

史臣韓愈曰順宗之爲太子也留心藝術善隸書德宗工爲詩每賜大臣方鎮詩制必命書之性寬仁有斷禮重師傅必先致拜從幸奉天賊泚逼迫常身先禁旅乘城拒戰督勵將士無不奮激德宗在位歲久稍不假權

宰相左右倖臣如裴延齡李齊運韋渠牟等因間用事
刻下取功而排陷陸贄張滂輩人不敢言太子從容論
爭故卒不任延齡渠牟爲相常侍宴魚藻宮張水嬉綵
艦雕靡宮人引舟爲權歌絲竹閒發德宗歡甚太子引
詩人好樂無荒爲對每於敷奏未嘗以顏色假借宦官
居儲位二十年天下陰受其賜惜乎寢疾踐阼近習弄
權而能傳政元良克昌運祚賢哉

憲宗上

憲宗聖神章武孝皇帝

昭文章武大聖
至神孝皇帝

諱純順宗長子

也母曰莊憲王太后大厯十三年二月生於長安之東

內六七歲時德宗抱置膝上問曰汝誰子在吾懷對曰
是第三天子德宗異而憐之貞元四年六月封廣陵王
順宗卽位之年四月冊爲皇太子七月乙未權勾當軍
國政事八月丁酉朔受內禪乙巳卽皇帝位於宣政殿
先是連月霖雨上卽位之日晴霽人情欣悅丙午昇平
公主進女口十五人上曰太上皇不受獻朕何敢違其
還郭氏丁未始御紫宸對百僚己酉以道州刺史路恕
爲邕管經畧使庚戌荆南獻龜二詔曰朕以寡昧纂承
丕業永思理本所寶惟賢至如嘉禾神芝奇禽異獸蓋
王化之虛美也所以光武形於詔令春秋不書祥瑞朕

誠薄德思及前人自今已後所有祥瑞但令準式申報

有司不得上聞其奇禽異獸亦宜停進癸丑劍南西川

節度使檢校太尉中書令南康郡王韋臯薨

行軍司馬劉闢白稱

留後甲寅以常州刺史穆贊爲宣歙池觀察使以前宣歙

觀察使崔衍爲工部尙書

戊午天有聲於西北

已未以中書侍郎

同平章事袁滋爲劍南東西川山南西道安撫大使時

韋臯卒劉闢據蜀邀節鉞故也辛酉太上皇詔冊良娣

王氏爲太上皇后癸亥以朝請大夫守尙書左丞輕車

都尉賜紫金魚袋鄭餘慶同中書門下平章事丙寅以

饒州刺史李吉甫爲考功郎中夔州刺史唐次爲吏部

郎中並知制誥九月丁卯朔己巳罷教坊樂人授正員
官之制辛未河陽三城節度使元韶卒癸酉以陳州刺
史孟元陽爲懷州刺史河陽三城孟懷節度使丙子敕
申光蔡陳許兩道比遭亢旱宜加賑恤申光蔡賑米十
萬石陳許五萬石丁丑前戶部侍郎蔡弁卒襄州于頔
進薦詔還之己卯京西神策行營節度行軍司馬韓泰
貶撫州刺史司封郎中韓曄貶池州刺史禮部員外郎
柳宗元貶邵州刺史屯田員外郎劉禹錫貶連州刺史
坐交王叔文也辛巳給事中陸質卒冬十月丙申朔丁
酉集百僚發曾太皇太后沈氏哀於肅章門外檢校司

空兼左僕射同平章事魏國公賈耽卒戊戌以宰臣劍
南安撫使袁滋檢校吏部尙書同平章事成都尹劍南
西川節度觀察等使以西川行軍司馬劉闢爲給事中
舒王誼薨庚子南詔使趙迦寬來赴山陵浙東觀察使
賈全卒辛丑吐蕃使論乞縷貢助山陵金銀衣服太常
上大行曾太皇太后沈氏諡曰睿貞皇后丙午以華州
刺史楊於陵爲越州刺史浙東觀察使丁未改桂州純
化縣爲慕化縣蒙州純義縣爲正義縣己酉葬德宗皇
帝於崇陵甲寅以刑部尙書高郢爲華州刺史潼關防
禦鎮國軍使御史中丞李鄘爲京兆尹貶京兆尹王權

爲雅王傳久雨京師鹽貴出庫鹽二萬石糶以惠民十一月己巳耐睿貞皇后神主德宗皇帝神主於太廟壬申貶正議大夫中書侍郎同平章事韋執誼爲崖州司馬以交王叔文也潤池揚楚湖杭睦江等州旱貶劍南西川節度使袁滋爲吉州刺史以其慰撫三川逗留不進故也以左驍衛將軍李演爲夏州刺史夏綏銀節度使

使

夏綏銀節度留後楊惠琳反

以右庶子武元衡爲御史中丞己卯

再貶撫州刺史韓泰虔州司馬河中少尹陳諫台州司馬邵州刺史柳宗元永州司馬連州刺史劉禹錫朗州司馬池州刺史韓曄饒州司馬和州刺史凌準連州司

馬岳州刺史程昇郴州司馬皆坐交王叔文初貶刺史
物議罪之故再加貶竄辛巳宣撫和郴郢袁衢七州旱
壬午吏部尙書鄭珣瑜卒甲申以湖南觀察使揚憑爲
洪州刺史江西觀察使以虢州刺史薛苹爲潭州刺史
湖南觀察使鄂岳婺衡等州旱癸巳宣歙觀察使穆贊
卒十二月丙申朔庚子以東都留守韋夏卿爲太子少
保以兵部尙書王紹爲東都留守壬寅改淳州爲蠻州
還淳縣爲青溪縣淳風縣爲從化縣姓淳于者改姓于
甲辰襄陽于頔加同平章事丙午月犯畢己酉以新除
給事中西川行軍司馬劉闢爲成都尹劍南西川節度

使歲星犯太微西垣庚戌金州復析漢陰縣置石泉縣
壬子以右諫議大夫韋丹爲梓州刺史劍南東川節度
使以常州刺史路應爲宣州刺史宣歙池觀察使壬戌
以朝請大夫守中書舍人翰林學士上柱國鄭綱爲中
書侍郎同中書門下平章事集賢殿學士以考功郎中
知制誥李吉甫爲中書舍人以考功員外郎裴埒爲考
功郎中知制誥並充翰林學士

元和元年春正月丙寅朔皇帝率羣臣於興慶宮奉
太上皇尊號曰應乾聖壽太上皇丁卯御含元殿受朝
賀禮畢御丹鳳樓大赦天下改元曰元和自正月二日

昧爽已前大辟罪已下常赦不原者咸赦除之

賜文武官階勳

爵民高年者米帛羊酒

辛未以鄂岳沔觀察使韓臯爲鄂岳蘄安

黃等州節度使丁丑太子少保韋夏卿卒辛巳以興元

元從功臣右神策護軍使副薛盈珍爲右神策護軍中

尉壬午成德軍節度使檢校司空王士真加同平章事

癸未詔以太上皇舊恙愆和親侍藥膳起今月十六日

已後權不聽政以左神策長武城防秋都知兵馬使高

崇文檢校工部尙書充神策行營節度使甲申太上皇

崩於興慶宮遷殯於太極殿發喪

劉闢陷梓州執李康

乙酉宰相

杜佑攝冢宰杜黃裳爲禮儀使右僕射伊慎大明宮留

守視事於尙書省壬辰復置斜谷路館驛戊子制劍南
西川疆界素定藩鎮守備各有區分頃因元臣薨謝鄰
藩不睦劉闢乃因虛構隙以忿結讎遂勞王軍兼害百
姓朕志存含垢務欲安人遣使諭宣委之旄鉞如聞道
路擁塞未息干戈輕肆攻圍擬圖吞併爲君之體義在
勝殘命將興師蓋非獲已宜令興元嚴礪東川李康倚
角應接神策行營節度使高崇文神策兵馬使李元奕
率步騎之師與東川興元之師類會進討其糧料供餉
委度支使差官以聞甲午高崇文之師由斜谷路李元
奕之師由駱谷路俱會於梓潼辛卯羣臣請聽政二月

乙未朔以度支郎中寬敬爲山劍行營糧料使嚴礪奏
收劍州辛丑入朝奚王梅落可銀青光祿大夫檢校司
空封饒樂郡王放還蕃癸卯贈宣武軍節度使陸長源
爲右僕射贈故吉州刺史姜公輔禮部尙書甲辰以錢
少禁用銅器癸丑魏博田季安加同平章事戊戌戊戌上下
字有謂宰臣曰前代帝王或怠於聽政或躬決繁務其
道如何杜黃裳對曰帝王之務在於脩己簡易擇賢委
任宵旰以求民瘼捨己從人以厚下固不宜怠肆安逸
然事有綱領大小當務知其遠者大者至如簿書訟獄
百吏能否本非人主所自任也昔秦始皇自程決事見

嗤前代諸葛亮王霸之佐二十罰以上皆自省之亦爲
敵國所誚知不久堪魏明帝欲省尙書擬事陳矯言其
不可隋文帝日旰聽政令衛士傳餐文皇帝亦笑其煩
察爲人主之體固不可代下司職但擇人委任責其成
效賞罰必信誰不盡心傳稱帝舜之德曰夫何爲哉恭
己南面而已誠以能舉十六相去四凶也豈與勞神疲
體自任耳目之主同年而語哉但人主常勢患在不能
推誠人臣之弊患在不能自竭由是上疑下詐禮貌或
虧欲求致理自然難致苟無此弊何患不至於理上稱
善久之以京兆尹李鄴爲尙書右丞以右金吾大將軍

鄭雲達爲京兆尹三月乙丑朔戊辰詔常參官寒食拜墓在畿內聽假日往還他州府奏取進止辛未御史中丞武元衡奏中書門下御史臺五品已上官尙書省四品已上諸司正三品已上從三品職事官東都留守轉運鹽鐵節度觀察使團練防禦招討經畧等使河南尹同華州刺史諸衛諸軍三品已上官除授皆入閣謝其餘官許於宣政南班拜訖便退詔曰如此例中有加使及職掌並準此又兵部吏部禮部貢院官員每舉選限內有十月至二月不奉朝參若稱事繁則中書門下御史臺度支京兆府公事至重朝謁如常況旬節已賜歸

休又許分日一月之內纔奉十日朝參甚暑甚寒又蒙
矜放臣求故實以爲王顏任中丞日嘗論其事舉對甚
詳伏請準貞元十二年四月二十七日敕永爲常式從
之丙子嚴礪收梓州丁丑制削奪劉闢在身官爵先是
韓全義入朝令其甥楊惠琳知留後俄有詔除李演爲
節度代全義演赴任惠琳據城叛詔發河東天德兵誅
之辛巳夏州兵馬使張承金斬惠琳傳首以獻壬辰大
行太上皇德妃董氏薨以右神策行營節度使高崇文
檢校兵部尙書梓州刺史劍南東川節度使夏四月戊
戌以安南經畧副使張舟爲安南都護本管經畧使已

亥以前劍南東川節度使韋丹爲晉絳觀察使壬寅以前安南經畧使趙昌爲廣州刺史嶺南節度使癸卯前嶺南節度使徐申卒丙午命宰臣監試制舉人於尙書省以制舉人先朝所徵不欲親試也丁未以檢校司空同平章事杜佑爲司徒所司備禮冊拜平章事如故罷領度支鹽鐵轉運等使從其讓也仍以兵部侍郎李巽代領其任戊申以隴右經畧使秦州刺史劉潼爲保義軍節度使賑浙東米十萬石己未武元衡奏常參官兼御史大夫中丞者準檢校省官例立在本品同類之上壬戌邵王約薨武元衡奏正衙待制官本置此官以備

問比來正衙多不奏事自今後請以尙書省六品

新書四品

以上職事官東宮師傅賓詹王傅等每坐日令兩人待
退朝詔於延英候對從之五月甲子朔丁卯京兆尹鄭
雲逵卒辛未以兵部侍郎韋武爲京兆尹兼御史大夫
壬申貶劍南東川節度使李康爲雷州司馬陳許蔡等
州旱以橫海軍留後程執恭爲橫海軍節度使庚辰尙
書左丞同平章事鄭餘慶爲太子賓客罷知政事辛卯
冊太上皇后王氏爲皇太后六月癸巳朔以冊太后禮
畢赦天下繫囚死罪降從流流以下遞減一等文武內
外官加母邑號太后諸親量與優給

百姓有父母祖父母八十以上者粟

二斛物二段九十以上粟三斛物三段

丙申冊德宗充容武氏為崇陵德

妃大風折樹丁酉高崇文破賊萬人於鹿頭關加幽州

劉濟侍中淄青李師古檢校司徒癸卯

嚴礪敗賊於石碑谷

高崇

文收漢州閏月壬戌朔淄青李師古卒

其弟師道自稱留後

戊辰

以祕書監董叔經為京兆尹壬午諫議大夫去左右字

只置四員以前司封員外郎韋況為諫議大夫甲申吐

蕃論勃藏來朝貢秋七月壬辰朔壬寅葬順宗於豐陵

己酉太子少保致仕韓全義卒

癸丑高崇文及劉闢戰於元武敗之

八月

辛酉朔癸亥以左衛大將軍李愿檢校禮部尚書夏州

刺史夏綏銀節度使甲子郇王母王昭儀宋王母趙昭

儀鄭王母張昭訓衡王母閻昭訓等各以其王並爲太妃以許氏爲美人尹氏段氏爲才人潯陽公主母崔昭訓爲太妃韓全義子進女樂八人詔還之丁卯封皇子平原郡王寧爲鄧王同安郡王寬爲澧王建安郡王宥爲遂王彭城郡王察爲浹王高密郡王寰爲洋王文安郡王寮爲絳王第十男審爲建王己巳以建王審爲鄆州大都督平盧淄青節度使以節度副使李師道權知鄆州事充節度留後乙亥冊妃郭氏爲貴妃靈武李樂奏黃河岸塌處得古錢三千三百其形小方孔三足壬午左降官韋執誼韓泰陳諫柳宗元劉禹錫韓曄凌準

程昇等八人縱逢恩赦不在量移之限癸未京兆尹董叔經卒甲申御史臺奏常參官在城未上及在外未到假故等在外未到計水陸程外滿百日並停解從之丙戌以尙書右丞李鄜爲京兆尹九月辛卯朔癸卯詔自今後兩省官每坐日一人對丙午以太子賓客鄭餘慶爲國子祭酒

嚴礪及劉闢戰於神泉敗之

辛亥高崇文奏收成都擒

劉闢以獻癸丑以山人李渤爲左拾遺徵不至冬十月

甲子易定張茂昭來朝

滅劍南東西川山南西道今歲賦釋脅從將吏葬陣亡者稟其

家五歲

丙寅以劍南東川節度使檢校兵部尙書梓州刺

史渤海郡王高崇文檢校司空兼成都尹御史大夫充

劍南西川節度副大使知節度事管內度支營田觀察
使處置統押近界諸蠻及西山八國兼雲南安撫等仍
改封南平郡王食邑三千戶戊戌

案是月無戊戌誤

以山南西

道節度使嚴礪爲梓州刺史劍南東川節度使以將作

監柳晟檢校工部尙書兼興元尹山南西道節度使庚

辰以吉州刺史袁滋爲御史大夫義成軍節度使壬午

以淄青節度留後李師道檢校工部尙書兼鄆州長史

平盧淄青節度副大使知節度事丙戌以渤海國王大

嵩鄰檢校太尉戊子斬劉闢并子超郎等九人於獨柳

樹下十一月庚寅朔乙巳以雅王傳王權爲河南尹丁

未以司農卿李上公爲陝州長史陝虢觀察使戊申以武寧軍節度使張愔爲工部尙書以東都留守王紹檢校右僕射兼徐州刺史武寧軍節度使徐泗濠觀察等使庚戌以吏部侍郎趙宗儒爲東都留守東畿汝都防禦使以國子祭酒鄭餘慶爲河南尹甲寅以給事中劉宗經爲華州刺史潼關防禦鎮國軍使丙辰以內常侍吐突承璀爲神策護軍中尉十二月庚申朔太常奏隱太子章懷懿德節閔惠莊惠文惠宣靖恭昭靖以下九太子陵代數已遠官額空存今請陵戶外並停乙亥工部尙書張愔卒丙戌新羅渤海牂牁迴紇各遣使朝貢

是歲召
王偲薨

二年春正月己丑朔上親獻太清宮太廟己丑朝獻於太清宮庚寅

朝享於太廟辛卯祀昊天上帝於郊丘是日還宮御丹鳳樓

大赦天下賜文武官階勳爵文宣公二王後三恪公主諸王一子官高年米帛羊酒加版授先

是將及大禮陰晦浹辰宰臣請改日上曰郊廟事重齋

戒有日不可遽更享獻之辰景物晴霽人情欣悅丁酉

司徒杜佑辭知政事詔令每月三度入朝便於中書商

量政事庚子迴紇請於河南府太原府置摩尼寺許之

乙巳以門下侍郎同平章事南陽郡開國公杜黃裳檢

校司空同平章事兼河南尹河中晉絳節度使停諸陵

留守己酉以戶部侍郎

新書御史中丞

賜緋魚袋武元衡爲門

下侍郎賜紫金魚袋以中書舍人翰林學士李吉甫爲

中書侍郎並同中書門下平章事丁巳停中和重陽二

節賜宴其上巳宴仍舊賜之二月辛酉詔僧尼道士全

隸左右街功德使自是祠部司封不復關奏丙寅左右

羽林軍應管月番飛騎總五千六百一十三人並停已

起居舍人鄭隨次對面受進止令宣與兩省供奉官

自今已後有事卽進狀次對宣宜停庚午司天造新厯成

詔題爲元和觀象厯壬申夜月掩歲星

癸酉邕管經畧使路恕敗黃洞

蠻執其首領黃承慶

丁丑寒食節宴羣臣於麟德殿賜物有差壬

午以第五國軫爲右神策軍中尉三月辛卯賜羣臣宴
於曲江亭癸卯判度支李翼爲兵部尙書依前判度支
鹽鐵轉運使夏四月甲子禁鉛錫錢以右金吾衛大將
軍范希朝檢校司空靈州長史朔方靈鹽節度使戊寅
近置英武軍額宜停庚辰嶺南節度使趙昌進瓊管儋
振萬安六州六十二洞歸降圖六月丁巳朔始置百官
待漏院於建福門外故事建福望仙等門昏而閉五更
而啟與諸坊門同時至德中有吐蕃囚自金吾仗亡命
因敕晚開門宰相待漏於太僕寺車坊至是始令有司
據班品置院戊午鳳翔節度使張敬則卒乙丑五坊色

役戶及中書門下兩省納課陪厨戶及捉錢人並歸府縣色役已巳停舒廬滁和四州團練使額癸酉東都莊宅使織造戶並委府縣收管乙亥停潤州丹陽軍額丙子左神策軍新築夾城置元化門晨耀樓辛巳以京兆尹李鄜爲鳳翔尹鳳翔隴右節度使蔡州水平地深七八尺秋七月丙戌朔敕刑部侍郎許孟容等刪定開元格後敕丁亥敕外命婦朝謁皇太后多有前却今後諸親委宗正寺百官母妻委臺司如有違越者夫子奪一月俸頻不到有司具狀奏聞戊子錄配享功臣之後得蘇瓌孫繫用爲京兆尹司錄崔元暉孫元方張說孫裔

並爲監察御史狄仁傑曾孫元範爲右拾遺敬暉孫元亮袁恕已孫德師相次叙用癸巳太僕寺丞令狐丕進
父峘所撰代宗實錄四十卷詔贈峘工部尙書八月
丙辰朔辛酉宰相武元衡兼判戶部事壬戌刑部奏改
律卷第八爲鬪競律甲子以職方員外郎王潔爲嶺南
選補使監察御史崔元方監之甲戌中書省奏先停諸
道奏祥瑞伏以所獻祥瑞皆緣臘饗告廟元會奏聞今
後諸大瑞隨表聞奏中瑞下瑞申有司其元日奏祥瑞
請依令式從之辛巳封杜黃裳爲邠國公于頔爲燕國
公沒蕃僧惟良闡等四百五十人自蕃中還九月乙酉

密王綢薨冬十月己未以浙西節度使李錡爲左僕射以御史大夫李元素爲潤州刺史鎮海軍浙西節度使庚申李錡據潤州反殺判官王澹大將趙琦時錡詐請入朝署澹爲留後因諷兵士亂殺澹琦遂令蘇常杭湖睦五州戍將殺刺史修石頭故城謀欲僭逆壬戌詔李錡屬列宗枝任居方伯窮赫奕之貴飽綢繆之恩待以親賢報之以逆節授其師旅用之以亂常累獻表章亟請朝會初則詐疾後乃縱兵僚佐以獻規受屠王臣以傳命見脅朕切於含垢未忍發明累降中人令遵前旨無輶車之戒路有沴氣之滔天加以日逞淫刑月興暴

賦朕爲人父母聞甚惻然顧惟紀綱焉敢墜廢李錡在
身官爵並宜削奪

乙丑

以淮南節度使王鏐充諸道行營

招討使內官薛尚衍爲監軍率汴徐鄂淮南宣歙之師

取宣州路進討丁卯以門下侍郎同平章事武元衡檢

校吏部尚書兼門下侍郎同平章事成都尹劍南西川

節度使封臨淮郡公將行上御安福門慰勞之癸酉潤

州大將張子良李奉僊等執李錡以獻

已卯免潤州今歲稅

辛巳

錡從父弟宋州刺史銛通事舍人銑坐貶嶺外十一月

甲申斬李錡於獨柳樹詔削錡屬籍丙戌以擒李錡潤

州牙將張子良爲左金吾衛將軍封南陽郡王田少卿

李奉僊等爲羽林將軍並封公甲辰詔司徒杜佑筋力未衰起今後每日入中書視事十二月甲寅宰相李吉甫封贊皇侯丙辰上謂宰臣曰朕覽國書見文皇帝行事少有過差諫臣論諍往復數四况朕之寡昧涉道未明今後事或未當卿等每事十論不可一二而止丁巳東都國子監增置學生一百人癸亥御史臺奏文武常參官準乾元元年三月十四日敕如有朝堂相弔慰及跪拜待漏行立失序語笑誼譁入衙入閣執笏不端行立遲慢立班不正趨拜失儀言語微誼穿班穿仗出入閣門無故離位廊下飲食行坐失儀誼鬧入朝及退朝

不從正衙出入非公事入中書等每犯奪一月俸班列
不肅所由指撝猶或飾非卽具聞奏貶責臣等商量於
舊條每罰各減一半所貴有犯必舉從之丙寅以劍南
西川節度使高崇文檢校司空同平章事兼邠州刺史
邠寧慶節度使充京西諸軍都統壬申禮部舉人罷試
口義試墨義十條五經通五明經通六卽放進士舉人
曾爲官司科罰曾任州縣小吏雖有辭藝長吏不得舉
送違者舉送官停任考試官貶黜丙子令宰臣宣敕百
僚遊宴過從餞別此後所由不得奏報務從歡泰保義
軍節度使劉潼卒已卯史官李吉甫撰元和國計簿總

計天下方鎮凡四十八管州府二百九十五縣一千四百五十三戶二百四十四萬二百五十四其鳳翔鄜坊邠寧振武涇原銀夏靈鹽河東易定魏博鎮冀范陽滄景淮西淄青十五道凡七十一州不申戶口每歲賦入倚辦止於浙江東西宣歙淮南江西鄂岳福建湖南等八道合四十九州一百四十四萬戶比量天寶供稅之戶則四分有一天下兵戎仰給縣官者八十三萬然人比量天寶士馬則三分加一率以兩戶資一兵其他水旱所損徵科發歛又在常役之外吉甫都纂其事成書十卷是歲吐蕃迴紇奚契丹渤海牂牁南詔並朝貢

三年春正月癸未朔癸巳羣臣上尊號曰睿聖文武皇

帝御宣政殿受冊禮畢移仗御丹鳳樓大赦天下

罷諸道受

代進奉錢庚子涇原段佑請修臨涇城在涇州北九十里扼

犬戎之衝要詔從之戊申罷左右神威軍合爲一號天

威軍二月丙申

案是月無丙申誤

宰相李吉甫進封趙國公乙

丑以武昌軍節度使韓臯爲潤州刺史鎮海軍節度浙

西觀察使辛未贈故布衣崔善貞睦州司馬忠諫而死

於李錡也癸酉以鄜坊節度使裴玢爲興元尹山南西

道節度使丙子以右金吾衛大將軍路恕爲鄜州刺史

鄜坊節度使戊寅咸安大長公主卒於迴紇三月癸巳

郇王總薨庚子以定平鎮兵馬使朱士明爲四鎮北庭
涇原節度使乙巳御宣政殿試制科舉人夏四月癸丑
中使郭里旻酒醉犯夜杖殺之金吾薛伾巡使韋纁皆
貶逐賜朱士明名曰忠亮乙丑貶翰林學士王涯虢州
司馬時涯甥皇甫湜與牛僧孺李宗閔並登賢良方正
科第三等策語太切權倖惡之故涯坐親累貶之壬申
大風毀含元殿欄檻二十七間乙亥以嶺南節度使趙
昌爲江陵尹荆南節度使以戶部侍郎楊於陵爲廣州
刺史嶺南節度使丁丑以荆南節度使裴均爲右僕射
判度支敕五月一日御殿受朝賀禮宜停己卯裴均於

尚書省都堂上僕射其送印

闕

呈孔目唱案授案皆尚

書郎爲之文武三品已上升階列坐四品五品及郎官御史拜於廳下然後召御史中丞左右丞侍郎升階答拜雖修故事行之議者論其太過五月壬辰兵部請復武舉從之甲午敕東都畿汝州都防禦使及副使宜停所管將士三千七百三十人隨畿汝界分留守及汝州防禦使分掌之辛丑右僕射裴均請取荆南雜錢萬貫修尚書省從之丙午正衙冊九姓迴紇可汗爲登囉里汨密施合毗伽保義可汗六月戊辰

戊辰上下詔以錢字有一譌

少欲設畜錢之令先告諭天下商賈畜錢者並令逐便

市易不得畜錢天下銀坑不得私採癸亥以邕管將黃少卿爲歸順州刺史弟少高少溫並受官西原蠻酋也貞元中屢寇邕管至是歸款乙丑罷江淮私堰埭二十二從轉運使奏也甲戌以河南尹鄭餘慶爲東都留守丁丑沙陀突厥七百人攜其親屬歸振武節度使范希

朝

案希朝是時鎮朔方非振武當作朔方

乃授其大首領曷勒河波陰山

府都督秋七月辛巳朔日有食之己亥復以度支安邑解縣兩池留後爲權鹽使丁未涪州復隸黔中道八月庚申復置東都防禦兵七百人九月己丑淮南節度使王鐸來朝庚寅以山南東道節度使于頔守司空同中

書門下平章事以右僕射裴均檢校左僕射同平章事

襄州刺史山南東道節度使加宣武軍韓宏同平章事

丙申以戶部侍郎裴垍爲中書侍郎同中書門下平章

事

表鄭細爲
門下侍郎

戊戌以中書侍郎同平章事李吉甫檢校

兵部尙書兼中書侍郎同平章事揚州長史淮南節度

使以淮南節度使王鏐檢校司徒河中尹河中晉絳慈

隰節度使河中節度使檢校司空同平章事邠國公杜

黃裳卒是秋京師大雨冬十月己酉朔癸亥以太常卿

高郢爲御史大夫甲子以御史中丞竇羣爲湖南觀察

使旣行改爲黔中觀察使羣初爲李吉甫擢用及持憲

反傾吉甫吉甫劾其陰事故貶之丁卯度支使下判案
官以四員爲定十一月甲午橫海軍節度使程執恭來
朝十二月庚戌以臨涇縣爲行原州命鎮將郝玘爲刺
史自玘鎮臨涇西戎不敢犯塞甲子南詔異牟尋卒辛
未以諫議大夫段平仲使南詔弔祭仍立其子驃信笄
蒙閣勸爲南詔王是歲淮南江南江西湖南山南東道
旱

四年正月壬午免山南東道淮南江西浙東湖南荆南
今歲稅戊子簡王邁薨二月丁卯鄭綱罷爲太子賓客
給事中李藩爲門下侍郎同中書門下平章事三月乙
酉成德軍節度使王士真卒其子承宗自稱留後閏月
己酉以早降京師死罪非殺人者禁刺史境內權率諸
道旨條外進獻嶺南黔中福建掠良民爲奴婢者省飛

龍殿馬已未雨丁卯夏四月丙子朔戊寅國子祭酒馮
立鄧王寧爲皇太子
仇卒壬午裴均進銀器一千五百兩以違敕付左藏庫

甲申令皇太子居少陽院武功人張英奴撰迴波辭惑
衆杖殺之丙申撫州山人張洪騎牛冠履獻書於光順
門書不足採遣之庚子制故太尉西平郡王李晟宜編
附屬籍以太常卿李元素爲戶部尙書判度支以商州
刺史元義方爲福建觀察使甲辰以兵部侍郎權德輿
爲太常卿仍賜金紫以御史大夫高郢爲兵部尙書以
刑部郎中侍御史知雜李夷簡爲御史中丞五月丙午
朔辛酉刑部尙書鄭元卒丁卯鹽鐵使吏部尙書李巽

卒六月乙亥朔丁丑以河東節度使李鄘爲刑部尙書
諸道鹽鐵轉運使以靈鹽節度使范希朝爲太原尹北
都留守河東節度使以右衛上將軍王伋爲靈州長史
靈鹽節度使辛丑五嶺已北銀坑任人開採禁錢不過
嶺南秋七月乙巳朔御制前代君臣事迹十四篇書於
六扇屏風是月出書屏以示宰臣李藩等表謝之丁未
渭南暴水壞廬舍二百餘戶溺死六百人命府司賑給
乙卯右羽林統軍高固卒壬戌御史中丞李夷簡彈京
兆尹楊憑前爲江西觀察使時贓罪貶憑臨賀尉癸亥吐蕃
請和戊辰以尙書右丞許孟容爲京兆尹賜金紫八月甲

戊朔癸未兗州魚臺縣移置於黃臺市丙申安南都護
張舟奏破環王國三萬餘人獲戰象兵械并王子五十
九人癸卯贈太師裴冕宜配享代宗廟庭贈太師李晟
贈太尉段秀實宜配享德宗廟庭九月甲辰朔庚戌以
成德軍都知兵馬使鎮府右司馬王承宗起復檢校工
部尙書成德軍節度使以德州刺史薛昌朝檢校左散
騎常侍保信軍節度使德棣觀察等使昌朝薛嵩之子婚
於王氏時爲德州刺史朝廷以承宗難制乃割二州爲
節度以授昌朝制纔下承宗以兵虜昌朝歸鎮州新書在十
月辛巳丁卯邠寧節度使檢校司空同平章事高崇文卒

冬十月癸酉朔以右羽林統軍閻巨源爲邠州刺史邠
寧慶節度使以少府監崔頴爲同州刺史本州防禦長
春宮等使癸未詔成德軍節度使王承宗頃在苦廬潛
窺戎鎮而內外以事君之禮叛而必誅分土之儀專則
有辟朕念其先祖嘗有茂勲貸以私恩抑於公議使臣
旁午以告諭孽童俯伏以陳誠願獻兩州期無二事朕
亦收其後効用以曲全授節制於舊疆齒勲賢於列位
况德棣本非成德所管昌朝又是承宗懿親俾撫近鄰
斯誠厚澤外雖兩鎮內是一家而承宗象恭懷姦肖貌
稔惡欺裴武於得位之後囚昌朝於授命之中加以表

疏之間悖慢斯甚義士之所興歎天地之所不容恭行
天誅蓋示朝典承宗在身官爵並宜削奪以神策左軍
中尉吐突承璀爲鎮州行營招討處置等使以龍武將
軍趙萬敵爲神策先鋒將內官宋惟澄曹進玉馬朝江
等爲行營館驛糧料等使戊子京兆尹許孟容與諫官面
論征伐大事不可以內官爲將帥補闕獨孤郁其言激
切詔旨祇改處置爲宣慰猶存招討之名己丑詔諸軍
進討其王武俊士眞墳墓軍士不得樵採其士平士則
各守本官仍令士則各襲武俊之封庚寅冊鄧王寧爲
皇太子癸巳以冊儲肆赦繫囚死罪降從流流以下遞

降一等文武常參官外州府長官子爲父後者賜勲兩
轉工部侍郎歸登給事中呂元膺爲皇太子諸王侍讀
己亥吐突承璀軍發京師上御通化門勞遣之十一月
癸卯朔浙西蘇潤常州旱儉賑米二萬石甲子河南尹
杜兼卒己巳彰義軍節度使檢校司空同平章事吳少
誠卒其弟少陽自稱留後十二月壬申朔以戶部侍郎張宏靖爲
陝州長史陝虢觀察陸運等使賜金紫以陝虢觀察使
房式爲河南尹御史中丞李夷簡奏諸州府於兩稅外
違格科率請諸道鹽鐵轉運使度支巡院察訪報臺司
以憑舉奏從之

五年春正月壬寅朔己巳浙西觀察使韓臯以杖決安

吉令孫澥致死有乖典法罰一月俸料

左神策軍大將軍鄭定進及王

承宗戰死之

二月辛未朔戊子禮院奏東宮殿閣名及宮臣

姓名與太子名同者改之其上臺官列王官爵士無例輒改從之東臺監察御史元稹攝河南尹房式於臺擅令停務貶江陵府士曹參軍三月辛丑朔宰相杜佑與同列宴於樊川別墅上遣中使賜酒饌乙巳以御史中丞李夷簡爲戶部侍郎判度支以兵部侍郎王播爲御史中丞癸丑以太子賓客鄭絪檢校禮部尚書廣州刺史嶺南節度使己未制以遂王宥爲彰義軍節度使以

申州刺史吳少陽爲申光蔡節度留後甲子大風折木
丁卯宰相于頔請依杜佑例一月三朝從之夏四月庚
午朔癸酉戶部尙書李元素卒甲申鎮州行營招討使
吐突承璀執昭義軍節度使盧從史載從史送京師丁
亥河東范希朝奏破賊於木刁溝福州復置侯官長樂
二縣建州置將樂縣壬申壬申上下字有一譌以昭義都知兵馬
使潞州左司馬烏重胤爲懷州刺史河陽三城懷州節
度使以河陽節度使孟元陽爲潞州長史昭義軍節度
澤潞磁邢洛觀察使戊辰貶前昭義軍節度使盧從史
爲驩州司馬五月庚子朔乙巳昭義軍三千人夜潰奔

魏州右神策軍使段佑卒庚申吐蕃使論思卽熱朝貢并歸鄭叔矩路泌之柩六月庚午朔戊寅以太府卿李少和爲洪州刺史江西觀察使奚迴紇室韋寇振武癸巳應給食實封例節度使兼宰相每食實封百戶歲給八百端匹若是絹加給綿六百兩節度使不兼宰相每百戶給百匹軍使諸衛大將軍每百戶給三百五十端匹秋七月己亥朔庚子王承宗遣判官崔遂上表自首請輸常賦朝廷除授官吏丁未詔昭洗王承宗復其官爵待之如初諸道行營將士賜物二十八萬四百三十端匹時招討非其人諸軍解體而藩鄰觀望養寇空爲

逗撓以弊國賦而李師道劉濟亟請昭雪乃歸罪盧從
史而有承宗不得已而行之也幽州劉濟加中書令魏
博田季安加司徒淄青李師道加僕射並以罷兵加賞
也乙卯幽州節度使劉濟爲其子總鳩死庚申以虔州
刺史馬總爲安南都護本管經畧使八月己巳朔乙亥
上顧謂宰臣曰神仙之事信乎李藩對曰神仙之說出
於道家所宗老子五千文爲本老子指歸與經無異後
代好怪之流假託老子神仙之說故秦始皇遣方士載
童男女入海求仙漢武嫁女與方士求不死藥二主受
惑卒無所得文皇帝服胡僧長生藥遂致暴疾不救古

詩云服食求神仙多爲藥所誤誠哉是言也君人者但務求理四海樂推社稷延永自然長年也上深然之以浙東觀察使薛苹爲潤州刺史浙西觀察使以常州刺史李遜爲越州刺史浙東觀察使以都官郎中韋貫之爲中書舍人起居舍人裴度爲司封員外郎知制誥癸巳以鄧州刺史崔詠爲邕州刺史本管經畧使九月戊戌朔辛亥以吐突承璀復爲左軍中尉諫官以承璀建謀討伐無功請行朝典上宥之降承璀爲軍器使乃以內官程文幹爲左軍中尉壬戌以瀛州刺史劉總起復幽州長史幽州盧龍軍節度使癸亥以兵部尙書高郢

爲右僕射致仕丙寅制以正議大夫守太常卿上柱國
襄武縣開國侯賜紫金魚袋權德輿守禮部尙書同中
書門下平章事丁卯翰林學士獨孤郁守本官起居以
妻父權德輿在中書避嫌也冬十月戊辰朔以京兆尹
許孟容爲兵部侍郎以御史中丞王播代孟容又以呂
元膺代播升平大長公主薨庚辰宰相裴垍進所撰德
宗實錄五十卷賜垍錦綵三百匹銀器等史官蔣武韋
處厚等頒賜有差

張茂昭以易定
二州歸於有司

辛巳定州將楊伯玉

誘三軍爲亂拘行軍司馬任迪簡別將張佐元殺伯玉
迪簡謀歸朝三軍懼乃殺佐元壬辰制以迪簡檢校工

部尙書定州長史義武軍節度觀察北平軍等使甲午
以前義武軍節度使檢校太尉兼太子太傅同平章事
張茂昭檢校太尉兼中書令河中尹河中晉絳慈隰節
度使十一月戊戌朔浙西奏當鎮舊有丹陽軍今請併
爲鎮海軍從之庚子右金吾衛大將軍伊慎降爲右衛
將軍以行賂三十萬與中尉第五從直求爲河東節度
故也甲辰會王纁薨庚戌以前河中節度使王鐸檢校
司空兼太子太傅太原尹北都留守河東節度使以代
州刺史阿跌光進爲單于大都護振武麟勝節度度支
營田觀察押蕃落等使庚申以中書侍郎同平章事裴

均爲兵部尙書以前保信軍節度使薛昌朝爲右武衛將軍前爲王承宗虜之囚於鎮州至是歸朝故也丙寅吏部郎中柳公綽獻大醫箴上深喜納遣中使撫勞之十二月丁卯朔癸酉諸道鹽鐵轉運使刑部尙書李廌檢校吏部尙書兼揚州長史淮南節度使以河南尹房式爲宣州刺史宣歙池觀察采石軍等使以前宣歙觀察使盧坦爲刑部侍郎諸道鹽鐵轉運使壬午以吏部郎中柳公綽爲御史中丞以前御史中丞呂元膺爲鄂州刺史鄂黃岳沔蘄安觀察使以鄂岳觀察使郗士美爲河南尹新授諫議大夫蔣武請改名又以吏部侍郎

崔邠爲太常卿

六年春正月丙申朔以彰義軍留後吳少陽檢校工部
尙書彰義軍節度申光蔡觀察使敕諫議大夫孟簡給
事中劉伯芻工部侍郎歸登右補闕蕭俛等於豐泉寺
翻譯大乘本生心地觀音經庚申以淮南節度使中書
侍郎同平章事趙國公李吉甫復知政事集賢殿大學
士監修國史二月丙寅朔壬申門下侍郎同平章事李
藩爲太子詹事藩於吉甫不叶吉甫旣用事故罷藩相
位丙子河中節度使檢校太尉中書令張茂昭卒以太
府卿裴次元爲福建觀察使己丑忻王造薨癸己以陝

號觀察使張宏靖檢校禮部尙書河中尹河中晉絳慈
節度使以右丞衛次公爲陝州長史陝號觀察使以中
書舍人翰林學士李絳爲戶部侍郎以京畿民貧貸常
平義倉粟二十四萬石諸道州府依此賑貸三月乙未

朔以河南尹郗士美檢校工部尙書兼潞州長史昭義

軍節度使

戊戌有星隕於鄆州

丁未以檢校右僕射嚴綬爲江陵

尹荆南節度使河東舊使錫錢民頗爲弊宜於蔚州置
五鑪鑄錢乙卯畿內軍鎮牧放駙馬貴族略獲並不得
帶兵仗恐雜盜也夏四月乙丑朔戊辰兵部尙書裴垍
爲太子賓客以諫議大夫裴堪爲同州防禦使庚午以

戶部侍郎判度支李夷簡檢校禮部尙書襄州長史山
南東道節度使以刑部侍郎諸道鹽鐵轉運使盧坦爲
戶部侍郎判度支京兆尹王播爲刑部侍郎諸道鹽鐵
轉運使以福建觀察使元義方爲京兆尹癸酉以張茂
昭家妓四十七人歸定州已卯月近房以前荆南節度
使趙宗儒爲刑部尙書東都留守鄭餘慶爲兵部尙書
依前留守王播奏江淮五嶺已南兖鄆等鹽院元和五
年都收賣鹽價錢六百九十八萬五千五百貫校量未
改法已前四倍擡估虛錢一千七百四十六萬三千七
百貫除鹽本外付度支收管從之辛卯戶部奏置巡官

五月甲午朔取受王承宗錢物人品官王伯恭杖死庚子以左金吾衛將軍李惟簡檢校戶部尙書鳳翔尹隴右節度使丙午前山南東道節度使檢校左僕射同平章事裴均卒壬子以振武節度使阿跌光進夙彰誠節久立茂勲宜賜姓李氏弟洺州刺史光顏已從別敕處分六月甲子朔減教坊樂人衣糧丁卯中書門下奏官省則事省事省則人清官煩則事煩事煩則人濁清濁之由在官之煩省國家自天寶已後中原宿兵見在軍士可使者八十餘萬其餘浮爲商販度爲僧道雜入色役不歸農桑者又十有五六則是天下常以三分勞筋

苦骨之人奉七分坐衣待食之輩今內外官給俸料者
不下一萬餘員其間有職出異名奉離本局府寺曠廢
簪組因循者甚衆况歛財日寡而授祿至多設官有限
而入色無數九流安得不雜萬物安得不煩漢初置郡
不過六十文景醲化百王莫先則官少不必政紊郡多
不必事理今天下三百郡一千四百縣故有一邑之地
虛設羣司一鄉之甿徒分縣職所費至廣所制全輕伏
請敕吏兵部侍郎郎中給事中中書舍人各一人錯綜
利病詳定廢置吏員可併省者併省之州縣可併合者
併合之每年入仕者可停減者停減之此則利廣而易

求官少而易理稍減冗食足寬疲甿又國家舊章依品制俸官一品月俸三十千其餘職田祿米大約不過千石自一品以下多少可知艱難已來禁網漸弛於是增置使額厚請俸錢故大厯中權臣月俸有至九千貫者列郡刺史無大小給皆千貫常袞爲相始立限約乃至李泌又量其閒劇隨事增加時謂通濟理難減削然猶有名存職廢額去俸存閒劇之間厚薄頓異將爲永式須立常規從之乃命給事中段平仲中書舍人韋貫之兵部侍郎許孟容戶部侍郎李絳等詳定減省甲申以御史中丞柳公綽爲湖南觀察使丁亥太白近右執法

天文志無

戊子賜御史中丞竇易直緋魚袋秋七月癸巳朔
尚書右僕射致仕高郢卒庚申贈銀青光祿大夫太子
賓客裴均太子少傅八月癸亥朔戶部侍郎李絳奏諸
州闕官職田祿米及現任官抽一分職田請所在收貯
以備水旱賑貸從之乙丑以天德軍防禦使張煦爲夏
州刺史夏綏銀節度使丁卯荆南先制永安軍宜停辛
巳以常州刺史崔芑爲洪州刺史江西觀察使九月癸
巳朔以蜀州刺史崔能爲黔中觀察使戊戌富平縣人
梁悅爲父復仇殺秦杲授獄請罪特敕免死決杖一百
配流循州職方員外郎韓愈獻議執奏之減諸司流外

總一千七百六十九人貶黔中觀察使竇羣爲開州刺史以爲政煩苛辰錦二州蠻叛故也冬十月以前夏州節度使李愿檢校兵部尙書徐州刺史武寧軍節度使戊辰以戶部尙書韓臯爲東都留守判東都尙書省事以太子詹事李蕃爲華州刺史潼關防禦鎮國軍使以東都留守鄭餘慶爲吏部尙書己巳詔朕於百執事羣有司方澄源流以責實效轉運重務專委使臣每道有院分督其任今陝路漕引悉歸中都而尹守職名尙仍舊貫又諸道都團練使足修武備以靖一方而別置軍額因加吏祿亦旣虛設頗爲浮費思去煩以循本期省

事以便人其河南水陸運陝府陸運潤州鎮海軍宣州
采石軍越州義勝軍洪州南昌軍福州靖海軍等使額
並宜停所收使以下俸料一事已來委本道充代百姓
闕額兩稅仍具數奏聞戊寅詔王者之牧黎元也愛之
如子視之如傷苟或風雨不時稼穡不稔則必除煩就
簡惜力重勞以圖便安以阜生業况邦畿之內百役所
叢雖勤卹之令亟行而供億之制猶廣重以經夏炎暵
自秋霖澍南畝虧播植之功西成失豐登之望內乏口
食外牽王徭豈惟轉輸之虞慮有餒殍之患斯蓋理道
猶鬱和氣未通永言於茲良所咎歎京兆府每年所配

折糶粟二十五萬石宜放於百姓有粟情愿折納者時
估外特加優饒今春所貸義倉粟方屬歲饑容至豐熟
歲送納元和五年已前諸色逋租並放百官職田其數
甚廣今緣水潦諸處道路不通宜令所在貯納度支支
用令百官據數於太倉請受遭水旱處通計所損便與
除破不得檢覆爲理之本在乎安人咨爾尹京宰邑之
臣實爲親人阜俗之寄必當詢其疾苦奉我詔條恤隱
爲心無怠於事罔或徇利以剝下吐剛而茹柔使間井
咸安憚獲濟各勉忠孝宜悉朕懷丙戌以諫議大夫
孔戣爲皇太子諸王侍讀十一月壬辰朔癸巳新授華

州刺史李藩卒乙巳以工部尙書趙昌檢校兵部尙書
兼華州刺史潼關防禦鎮國軍使十二月癸亥朔壬申
詔委宗正卿選人門嫁十六宅諸王女仍封縣主甲申
京兆尹元義方戶部侍郎判度支盧坦以違令立戟罰
一月俸收奪所請門戟已丑制以朝議郎守戶部侍郎
驍騎尉賜紫金魚袋李絳爲朝議大夫守中書侍郎同
中書門下平章事閏月辛卯朔右衛大將軍伊慎卒辰
州首領張伯靖辛亥皇太子寧薨諡曰惠昭廢朝三日
反寇播費二州國典無太子薨禮國子司業裴蒞精禮學特敕於西內
定儀

唐書卷第十四

唐書十四 憲宗上

三